

Glisch verda per la gulivaziun da finanzas

La regenza grischuna è satisfatga dal resultat da votaziun

DAD ANDREAS CADONAU

■ **Cun in cler gea conferma il suveran dal chantun Grischun la politica da refurma instradada da regenza e cussegl grond. Per plaschair da la cussegliera guvernativa Barbara Janom Steiner. Ils adversaris vulan ussa sa concentrar sin las pussaivladads d'influenza en il parlament chantunal.** Fitg cuntenta è la cussegliera guvernativa *Barbara Janom Steiner* dal gea dal suveran grischun vers la refurma da la gulivaziun da finanzas. Cunzunt il cler gea ha procurà per satisfaziun, sco quei che la cussegliera guvernativa ha concedi sin dumonda. Ella ha ditg dad esser stada cunschienta da la complexitad da la materia e dad in suveran che voteschia gugent na sch'el haja il sentiment da na avair la survista. Per Barbara Janom Steiner ha il suveran acceptà in dals impurtants projects da refurma en il chantun Grischun. Tenor las explicaziuns da la la cussegliera guvernativa in project da refurma cun la clera finamira da rinforzar las vischnancas. Da la reproscha dals adversaris d'avair sulet repartgì daners ad ina maioritad da las vischnancas per retschaiver in gea a la refurma na tegn la cussegliera guvernativa nagut. Per ella è la refurma da la gulivaziun fitg ulivada che sa basa sin in sistem sa cumpruvà dapi intgins onns tar la confederaziun.



Il cler gea dal suveran a la refurma da la gulivaziun da finanzas cuntenta fitg la regenza grischuna.

KEYSTONE

Betg pudì persuader

Il novelegi president communal da la vischnanca da Trun, *Dumeni Tomaschett*, po sa legrar dal bun resultat d'elecziun. Main sa legrar po *Dumeni Tomaschett* dal resultat da la votaziun chantunala davart la nova gulivaziun. La suprastanza da Trun è s'angaschada fermamain envers la gulivaziun. Perschauder ha ella bain pudì l'atgna populaziun, las vischnancas vischinantas n'ha la suprastanza da Trun betg cuntanschì. Il cumin da la Cadi ha numnadamain approvà la gulivaziun. Surstà da quel resultat è *Dumeni Tomaschett* dentant betg. Per el èsi cler che las vischnancas che profiteschian da l'ulivaziun na vegnian betg a s'exprimer encunter il project. I saja legitim da sa dustar per ina vischnanca che stoppia quintar cun in minus da las entradas dad 800 000 francs. *Dumeni Tomaschett* è tuttina da l'avis che la summa numnada na saja betg definitiva. Ella sa basia sin la situaziun da Trun avant la fusiun cun la vischnanca da Schlans. Il novelegi president communal è da l'avis che la nova

situaziun influenzeschia a moda positiva ils pajaments da la gulivaziun chantunala a favur da la vischnanca da Trun.

La refurma sa chatta sin la dretga via

La deputada *Silvia Casutt* (pcd Foppa) ed anteriura presidenta communal da la vischnanca da Falera è s'angaschada a favur da la gulivaziun da finanzas. Ella ha titulà il resultat da votaziun per ina buna chausa. *Silvia Casutt* è das l'avis ch'i saja uras da remplazzar ina gulivaziun da 60 onns cun ina lescha moderna. La veglia gulivaziun haja dà impuls fallads a las vischnancas ed i saja stà necessari dad adattar il sistem grischun a la gulivaziun interchantunala da la confederaziun. Ch'il suveran è suandà cleramain la proposta da la regenza e dal parlament attribuescha la deputada dal cumin da la Foppa al fatg che divers puncts dispaivels en connex cun la scola u il socialessar sajan vegnids schliads ordaifer la gulivaziun. Vinavant saja il chantun sa mussà generus vers las vischnancas. En general è *Silvia Casutt* da l'avis ch'il process da refurma dal chantun Grischun sa sviluppeschia en la dretga direcziun.

Tegnair en egl

Dad in verdict dal suveran grischun envers las vischnancas da la Engiadina'Autta n'ha il president communal da Segl, *Christian Meuli*, betg vulì discurre. El ha visà ad ulteriuras vischnancas u regiuns che hajan medemamain refusà la nova gulivaziun. Schizunt en la citad da Cuira hajan 30 pertschient refusà la proposta. Per el è il gea a la nova gulivaziun plitost in gea... ma. Il president communal da Segl ha concedi ch'i saja stà grev da cuntanscher il suveran cun dumondas da detagl. El è da l'avis ch'il suveran saja un fis da la discussiun pertutgant gulivaziun e haja perquai acceptà la proposta. En l'avegnir vegnian ils adversaris da la gulivaziun a far diever da las pussaivladads dad influenzer il mecanissem dad ulivar las finanzas surdadas al cussegl grond. *Christian Meuli* ha discurrì dad in dretg democratic da las vischnancas da sa dustar envers ina proposta. Quai haja da far nagut cun mancanza da solidaritad. L'Engiadina'Autta saja in ferm intschess economic e far quel sapientivamain pli debel ina tuppada.



Cunter la Refurma da la gulivaziun da finanzas da regenza e cussegl grond avevan cunzunt represchents da l'Engiadina'Autta tschiffà il referendum.

FOTO Y. BÜRKL